

# PWYLLGOR CYSWLLT Y SECTOR GWIRFODDOL

## Cofnodion y cyfarfod a gynhaliwyd ar 3 Hydref 2013

<b>YN BRESENNOL:</b>	Mr Islwyn Humphreys (Cadeirydd)  <b>Yr Awdurdod Lleol</b>  Cynghorwyr Jim Evans, Kenneth Hughes, Alun Mummery, Alwyn Rowlands, Ieuan Williams  <b>Y Sector Gwirfoddol</b>  Eleri Lloyd Jones (Age Cymru) Aled Roberts (Taran) Dilys Shaw (Cadeirydd Medrwn Môn)  <b>Y Sector Iechyd</b>  Mr Wyn Thomas, Cyfarwyddwr Cynorthwyol Datblugu Cymunedol BPBC
<b>WRTH LAW:</b>	Mr John R. Jones (Prif Swyddog Medrwn Môn) Mrs Gwen Carrington (Cyfarwyddwr Cymuned - CSYM) Huw Jones (Pennaeth Gwasanaeth, Polisi - CSYM) Ann Holmes (Swyddog Pwyllgor)
<b>YMDDIHEURIADAU:</b>	Cadi Roberts (Merched y Wawr)
<b>HEFYD BRESENNOL:</b>	Ms Lyndsey Willimas (Rheolwr Prosiect, Medrwn Môn), Mr Tristan Pritchard (Rheolwr Uned Bartneriaeth Gwynedd a Môn)

---

### CROESO

Rhoddodd y Cadeirydd groeso i bawb oedd yn bresennol i Neuadd Gymuned Talwrn ar gyfer y cyfarfod hwn o Bwyllgor Cyswllt y Sector Gwirfoddol.

### 1 DATGANIAD O DDIDDORDEB

Nid oedd unrhyw ddatganiad o ddiddordeb wedi'i dderbyn.

### 2 COFNODION CYFARFOD 11 GORFFENNAF, 2013

Cyflwynwyd a chadarnhawyd fel rhai cywir, gofnodion y cyfarfod blaenorol o'r Pwyllgor Cyswllt a gynhaliwyd ar 11 Gorffennaf 2013.

Materion yn codi –

- Yng nghyswllt cyfranogiad y Trydydd Sector ym mhroses Sgriwtini'r Awdurdod cadarnhaodd y Pennaeth Gwasanaeth (Polisi) bod yr Adain Sgriwtini wedi bod mewn cyswllt gyda Phrif Swyddog Medrwn Môn i fynd a'r mater hwn yn ei flaen. Eglurodd y Swyddog bod y Pwyllgor Gwaith yn diweddarau ei Raglen Waith drwy ei gyfarfodydd misol sydd yn eu tro yn bwydo i mewn ac yn rhoi gwybodaeth ar gyfer blaenoriaethau'r Rhaglen Waith Sgriwtini. Fel sydd wedi ei gytuno mae Rhaglen Waith ar y Cyd gyda'r Trydydd Sector yn seiliedig ar allbynnau'r Pwyllgor Cyswllt yn

dechrau cael ei datblygu a bydd hyn yn hwyluso ymwneud y Trydydd Sector yn nhrefniadau democrataidd y Cyngor, gan gynnwys Sgriwtini.

Cadarnhaodd Prif Swyddog Medrwn Môn ei fod wedi trafod y mater gyda'r Rheolwr Sgriwtini ac y byddai'n hoffi cael sicrwydd y bydd cynnydd pendant yn cael ei wneud. Fodd bynnag, rhaid i gyfranogwyr tebygol o'r Trydydd Sector fod wedi eu hyfforddi'n briodol er mwyn sicrhau eu bod yn dod ag ystod eang o brofiad ac arbenigedd i'r trafodaethau sgriwtini ac na fyddant ond yn bresennol yno fel cynrychiolwyr eu sefydliad unigol. Mae gan y Trydydd Sector, fodd bynnag, gronfa o unigolion sydd â dealltwriaeth o'r hyn y mae'n ei olygu i weithredu fel cynrychiolydd ac i weithio mewn partneriaeth. Dywedodd Prif Swyddog Medrwn Môn ei fod yn ymwybodol bod y mater hwn wedi bod yn mynd yn ei flaen am beth amser ond mae'n golygu mwy na dim ond dewis unigolion i ymgymryd â'r rôl ond gwneud yn siŵr bod grŵp o bobl wedi eu hyfforddi ar gael ac yn gallu gweithredu'n effeithiol.

Cytunodd Arweinydd y Cyngor gyda'r dadansoddiad a wnaed ac atgoffodd y Pwyllgor nad yw Pwyllgorau Sgriwtini yn bwyllgorau gwleidyddol a'u bwriad yw defnyddio profiad ac arbenigedd eu haelodau i allu gwneud gwell penderfyniadau.

Dywedodd Prif Swyddog Medrwn Môn y byddai'n cydlynu'r broses o ddewis cynrychiolwyr sgriwtini addas pan fydd yn amserol i wneud hynny.

### **Nodwyd y sefyllfa. Dim camau gweithredu pellach yn codi.**

- Gan gyfeirio at y Cytundeb Compact a'r Polisi Gwirfoddoli dywedodd y Pennaeth Gwasanaeth (Polisi) wrth y Pwyllgor ei fod wedi cael trafodaethau gyda Phrif Swyddog Medrwn Môn ynglŷn â lansio'r Cytundeb Compact yn ffurfiol gyda hynny wedi ei drefnu ar gyfer 7 Tachwedd. Cadarnhaodd Prif Swyddog Medrwn Môn bod Arweinydd y Cyngor wedi ei wahodd i fod yn rhan o'r lansiad fyddai hefyd yn gymorth i bwysleisio cymeriad partneriaeth y Compact fel cytundeb tair ffordd. Cafwyd diweddariad i'r Aelodau gan y Cyfarwyddwr Cymuned ar weithredu'r Polisi Gwirfoddoli a dywedodd bod y flaenoriaeth yn parhau yn un o godi ymwybyddiaeth Penaethiaid Gwasanaeth o'r polisi a nodi'r gwirfoddolwyr sydd ar hyn o bryd yn weithredol yn y system a sicrhau bod trefniadau priodol yn eu lle i gefnogi'r grŵp hwnnw ac i nodi cyfleon wedi hynny.
- Gan gyfeirio at y Côt Cyllido, dywedodd Prif Swyddog Medrwn Môn ei fod wedi cael cyfarfod gyda'r Pennaeth Gwasanaeth (Polisi) a'r Pennaeth Swyddogaeth (Adnoddau) i drafod diweddaru'r Côt Cyllido sy'n nodi'r trefniadau ar gyfer ymgysylltu gyda'r Trydydd Sector ar faterion cyllidol ac ariannol. Dywedodd bod adolygiad o'r Côt Cyllido yn amserol o ystyried bod yr hinsawdd ariannol wedi newid gyda mwy o bwyslais yn cael ei roi ar gyllido ar sail Cytundebau Lefel Gwasanaeth a thrwy broses gomisiynu yn hytrach na'r dull traddodiadol o ddyrannu grantiau ac y dylai'r newid hwn gael ei adlewyrchu yn y Côt Cyllido.

Dywedodd Y Cadeirydd ei fod yn bwysig bod y Trydydd Sector yn cael gwybod am y lefel o gyllid y mae'n debygol o'i dderbyn ar y cyfle cyntaf er mwyn helpu'r sector gyda'i broses gynllunio.

Dywedodd Arweinydd y Cyngor wrth yr Aelodau bod proses y gyllideb wedi cychwyn yn llawer cynt y flwyddyn hon gyda thrafodaethau cychwynnol yn cael eu cynnal fis Gorffennaf. Roedd Gweinidog Cyllid Llywodraeth Cymru wedi gohebu gyda'r Awdurdodau Lleol yng Nghymru ddechrau mis Medi ac mae'r arwyddion cynnar yn awgrymu y bydd y sefyllfa ariannol yn un heriol iawn yn y flwyddyn i ddod gyda thoriadau'n cael eu rhagweld o tua 5% neu £7.5m.

- Yng nghyswllt y Comisiwn ar Lywodraethu a Darparu Gwasanaeth Cyhoeddus yng Nghymru, dywedodd y Cyfarwyddwr Cymuned bod gwaith y Comisiwn yn parhau a bod yr Awdurdod wedi cyflwyno ymateb fel rhan o'r ymgynghoriad. Cyfeiriodd Arweinydd y Cyngor at gyfarfod o Gymdeithas Llywodraeth Leol Cymru lle oedd Syr Paul Williams, Cadeirydd y Comisiwn wedi siarad a dweud bod arwyddion y bydd yn yr hirdymor lai o sefydliadau gwasanaeth cyhoeddus yng Nghymru. Dywedodd y Pennaeth Gwasanaeth (Polisi) bod disgwyl y bydd argymhellion y Comisiwn yn cael eu cyhoeddi yn gynnar yn y Flwyddyn Newydd.
- Gan gyfeirio at y Prosiect Gwrando Llais Cymunedol, rhoddodd Ms Lyndsey Williams, Rheolwr Prosiect ddiweddariad i'r Pwyllgor ar weithgareddau. Cyfeiriodd at gylchu holiaduron i gael gwybodaeth waelodlin ynglŷn â faint o ddealltwriaeth sydd gan gymunedau o wasanaethau cyhoeddus ac am gynnal lluo o ddigwyddiadau ymgynghori i gael mwy o wybodaeth gefnogol ar gyfer y waelodlin. Soniodd y Swyddog hefyd am ddatblygiadau ynglŷn â phroses y weledigaeth

gymunedol oedd yn canolbwyntio i ddechrau ar Ward Seiriol a gweithgareddau mewn perthynas â'r lansiad swyddogol fydd yn dod ag aelodau'r gwahanol sectorau at ei gilydd i gael gwell dealltwriaeth o'r hyn y mae'r prosiect yn ceisio ei gyflawni. Bydd ymarfer gwerthuso'r prosiect yn cael ei gynnal gyda gwahoddiadau i dendro ar gyfer darparu'r gwerthusiad wedi eu rhoi allan a chyfweliadau wedi eu cynnal. Yng nghyswllt Ymgynghoriad Gwneud Gwahaniaeth yr Awdurdod, dywedodd bod nifer o faterion ynglyn â dull ac amserlen yr ymgynghoriad wedi eu nodi.

Dywedodd Arweinydd y Cyngor bod Adain Bolisi'r Awdurdod yn y broses o gasglu'r ymatebion i'r holiadur Gwneud Gwahaniaeth, sef cyfanswm o 900. Ychwanegodd y Pennaeth Gwasanaeth (Polisi) bod materion ynglyn â'r dulliau a ddefnyddiwyd i wneud yr ymgynghoriad a'r cyfyngiadau o ran amser a osodwyd ar y broses yn cael eu hadolygu gyda'r bwriad o wneud gwelliannau. Trafododd y Pwyllgor y gwersi oedd i'w dysgu o broses Ymgynghori Gwneud Gwahaniaeth o safbwynt cyrraedd cynulleidfa ehangach a defnyddio cyfryngau cymdeithasol i gael safbwyntiau pobl ifanc. Roedd yn cael ei gydnabod bod yr Ymgynghoriad Gwneud Gwahaniaeth wedi bod yn llwyddiannus o safbwynt cynhyrchu nifer uwch o ymatebion. Cyfeiriodd y Cyfarwyddwr Cymuned at ffyrdd o gydlynu ymgysylltiad gyda'r Trydydd Sector ac y roedd hynny wedi bod yn destun trafodaethau blaenorol ac mae'r broses bellach yn aeddfedu.

- Gan gyfeirio at y Rhaglen Waith a'r gweithdy, dywedodd y Pennaeth Gwasanaeth (Polisi) mai'r bwriad yw defnyddio Rhaglen Waith y Pwyllgor Gwaith i roi gwybodaeth ar gyfer Rhaglen Waith y Pwyllgor Cyswllt ac i gynllunio ar sail hynny.

### **3 BWRDD GWASANAETH LLEOL**

Rhoddodd y Cadeirydd groeso i Tristan Pritchard, Rheolwr Uned Partneriaeth Gwynedd a Môn i'r cyfarfod a gwahoddwyd ef i annerch yr Aelodau ynglyn a gwaith y Bwrdd Gwasanaethau Lleol ar y Cyd.

Cafwyd diweddariad gan Reolwr yr Uned Bartneriaeth ar y datblygiadau hyd yn hyn ar ôl y Bwrdd Gwasanaethau Lleol ar y Cyd (BELLC) drwy gyfeirio at y canlynol –

- Un o'r strategaethau allweddol yn cynnwys Plant a Phobl Ifanc, Diogelwch Cymunedol, Iechyd a Lles a'r Strategaeth Gymunedol i ffurfio un Strategaeth Integredig i Wynedd a Môn. Mae'r broses hon wedi ei chynllunio, ei gyrru a'i chraffu drwy greu Bwrdd Gwasanaethau Lleol ar y Cyd gyda'r sector gwirfoddol yn bartner llawn.
- Sefydlu'r Bwrdd Gwasanaethau Lleol ar y Cyd fel y brif bartneriaeth strategol i'r holl wasanaethau o fewn ei ddyletswyddau, h.y. Plant a Phobl Ifanc, Iechyd a Lles, a Diogelwch Cymunedol.
- Modus Operandi lle mae'r BELLC yn nodi'r blaenoriaethau o fewn y Cynllun Integredig yn cael ei gefnogi gan is-strwythur yn ffocysu ar ganlyniadau. Y Cynllun Integredig yw'r prif gerbyd ar gyfer gwireddu'r blaenoriaethau a osodwyd.
- Ffocws ar wella ymgysylltiad, cydberchnogaeth a dileu ffiniau sefydliadol.
- Y Cynllun Integredig fel rhaglen ataliol. Blaenoriaethau cynnar y BELLC sy'n cynnwys yr Iaith, Tlodi, yr Economi a Chryfhau ymgysylltiad.
- Nodau ac Amcanion yr Uned Partneriaeth ar y Cyd, yn cynnwys ychwanegu gwerth ac arwain ar faterion sydd angen ymyrraeth strategol ar y cyd.
- Strwythur llywodraethu gyda'r Bwrdd Gwasanaethau Lleol ar y Cyd yn gosod y cyfeiriad strategol; Bwrdd Darparu er mwyn sicrhau gweithrediad effeithiol a Grwpiau Darparu / Prosiect yn cyflawni canlyniadau. Mae'r strwythur llywodraethu wedi ei ddylunio fel bod y pwyslais yn fwy ar gyflawni canlyniadau nag ar gylich o gyfarfodydd gyda'r BELLC yn comisiynu amcanion clir mewn meysydd penodol i'w gwireddu gan y grwpiau darparu a phrosiect .
- Camau nesaf, yn cynnwys ffurfio Cynllun Integredig Sengl gyda'r broses honno eisoes yn cael ei gweithredu.

Rhoddwyd cyfle i'r Aelodau ofyn cwestiynau i Reolwr yr Uned Bartneriaeth ar y wybodaeth a gyflwynwyd. Dywedodd Arweinydd y Cyngor y byddai'n ddefnyddiol i'r Pwyllgor yn y man gael cyflwyniad ac/neu wybodaeth ar weithgareddau uniongyrchol y Bwrdd Gwasanaethau Lleol ar y Cyd. Dywedodd Rheolwr yr Uned Bartneriaeth y byddai'n hapus i wneud hynny unwaith y byddai'r grwpiau thematig/prosiect wedi mynd drwy'r sianelau adrodd yn ôl ac y byddai hefyd yn rhannu'r Cynllun Integredig Sengl drafft gyda'r Pwyllgor.

Dyweddod Prif Swyddog Medrwn Môn - cyn i'r Bwrdd Gwasanaethau Lleol ar y Cyd ddod i fodolaeth roedd yna strwythur lleol o grwpiau thematig gyda'r sector gwirfoddol fel rhan o'r strwythur hwnnw. Roedd ganddo rai pryderon gyda'r trefniadau'n cael eu taenu dros y ddwy sir y byddai rôl y sector gwirfoddol yn lleihau a phwysleisiodd ei bod yn bwysig parhau i ymgynghori gyda'r sefydliadau llai.

Dyweddod y Rheolwr Uned Partneriaeth mai'r nod yw cadw gweithgaredd lleol a bod gwaith yn cael ei wneud ar ddatblygu model gwahanol o weithio, e.e. drwy weithdai. Tra bod yna risg y bydd cysylltiadau lleol yn cael eu glastwreiddio, gall y Bwrdd Gwasanaethau Lleol ar y Cyd gymryd mantais o'r wybodaeth sydd yna am gymunedau a'u hanghenion ac sy'n cael ei chynhyrchu gan brosiectau fel y Prosiect Gwrando Llais Cymunedol.

Nodwyd y wybodaeth fel y'i cyflwynwyd.

**Camau Gweithredu'n Codi: Y Pennaeth Gwasanaeth (Polisi) i gysylltu gyda'r Rheolwr yr Uned Partneriaeth i drefnu i'r Pwyllgor Cyswllt dderbyn, yn y man, wybodaeth am weithgareddau uniongyrchol y Bwrdd Gwasanaethau Lleol ar y Cyd yn ogystal â chopi o'r Cynllun Integredig Sengl drafft.**

#### **4 FFRAMWAITH AR GYFER DARPARU IECHYD A GOFAL CYMDEITHASOL INTEGREDIG**

Cyflwynwyd i sylw'r Pwyllgor ddogfen ymgynghori ar y Fframwaith Darparu Gofal Iechyd a Chymdeithasol Integredig ynghyd â gohebiaeth a datganiad ysgrifenedig gan Weinidog Iechyd a Gwasanaethau Cymdeithasol Llywodraeth Cymru. Roedd y dogfennau yn nodi'r amcanion o roi'r Fframwaith ymlaen mewn ymateb i'r galw cynyddol am wasanaethau gan boblogaeth sy'n heneiddio yn ogystal â manteision integreiddio o ran creu mwy o gysondeb o ran canlyniadau iechyd a gofal cymdeithasol, newid yn ffocws y gofal o'r ysbytai i'r cartref a chanolbwyntio ymyrraeth gynnar, ail-alluogi a gofal canolraddol mewn un system.

Dyweddod y Cyfarwyddwr Cymuned bod yr amserlen ar gyfer ymateb i'r ddogfen uchod yn gyfyngedig a dywedodd wrth y Pwyllgor bod grŵp tasg eisoes wedi ei sefydlu ers mis Mawrth i hyrwyddo'r gwaith o integreiddio gwasanaethau gyda'r Sector Iechyd. Eglurodd bod disgwyl i bob Cyngor a Bwrdd Iechyd Lleol partner gyflwyno datganiad wedi ei gytuno a'i arwyddo ar gyfer integreiddio gwasanaethau i bobl hyn gydag anghenion dwys erbyn diwedd mis Ionawr 2014. Cynigiodd y dylai grŵp o bartneriaid yn cynnwys cynrychiolwyr o'r sector gwirfoddol, sector annibynnol, aelodau etholedig a'r swyddogion gyfarfod i sefydlu gwaelodlin gychwynnol ar gyfer symud ymlaen gyda gwasanaethau integredig gydag iechyd erbyn diwedd mis Rhagfyr 2013 o safbwynt cael dealltwriaeth o'r hyn sydd eisoes yn ei le a pha waith integreiddio pellach sydd ei angen ac yn bosibl. Dywedodd ei bod, fel y swyddog proffesiynol, yn cefnogi'r cynigion a'i bod yn awyddus i symud ymlaen gyda hwy ac i ddefnyddio'r trefniadau o fewn y Pwyllgor Cyswllt fel marciwr.

Yn y drafodaeth a ddilynodd, gofynnwyd cwestiynau am y sefyllfa ynglŷn ag adnoddau; ynglŷn â chronni adnoddau ac a oedd yna ddigon o adnoddau ar gael i weithredu'r cynigion yn y Fframwaith yn llawn. Crybwyllwyd hefyd sut y gallai canlyniad y Comisiwn ar Lywodraethu a Darparu Gwasanaethau Cyhoeddus ddylanwadu ac/neu ffitio i mewn gyda chynigion y Fframwaith o ran yr hyn y gall y Comisiwn ei weld fel y cerbyd gorau ar gyfer darparu gofal cymdeithasol i bobl hyn. Dywedodd y Cyfarwyddwr Cymuned bod yn rhaid i'r pwynt cychwyn fod ar ffurf trafodaeth ynglŷn â beth sydd angen rhoi sylw iddo ym Môn ac i berthnasu cynigion y Fframwaith i'r cynlluniau cyfredol ym Môn.

Nodwyd beth oedd gofynion y dogfennau.

**Camau Gweithredu yn Codi: Y Cyfarwyddwr Cymuned i gydlynu trefniadau ar gyfer cyfarfod gyda phartneriaid mewn ymateb i gynigion Fframwaith gyda golwg ar sefydlu gwaelodlin i wasanaethau integredig ym Môn mewn paratoad ar gyfer rhyddhau Datganiad o Fwriad erbyn diwedd Ionawr 2014.**

## 5 RHAGLEN TRAWSNEWID CORFFORAETHOL Y CYNGOR

Oherwydd absenoldeb Reolwr y Rhaglen Drawsnewid Gorfforaethol, rhoddodd y Pennaeth Gwasanaeth (Polisi) grynodedb i'r Pwyllgor o nodau ac amcanion rhaglen Trawsnewid Corfforaethol yr Awdurdod a'r strwythur ar gyfer ei darparu. Cyfeiriodd at y tri Bwrdd Rhaglen a'u themâu o amgylch rhagoriaeth gwasanaeth; menter, a thrawsnewid busnes ac i is-strwythur y byrddau prosiect sy'n ffocysu ar themâu penodol. Ehangodd Arweinydd y Cyngor ar y ffrydiau gwaith sydd o dan bob Bwrdd Rhaglen.

Holodd Prif Swyddog Medrwn Môn a fydd y Rhaglen Drawsnewid Gorfforaethol yn cael effaith ar gysylltiadau'r Awdurdod gyda'r gymuned a gyda'r Trydydd Sector o ran cyflwyno ffyrdd newydd o gefnogi'r sector a chymunedau. Dywedodd y byddai'n gwerthfawrogi cael trafodaeth ynglyn â'r mater hwn.

Dywedodd Arweinydd y Cyngor bod ffrwd waith wedi ei sefydlu sy'n delio â gofal cwsmer ac y byddai'r Trydydd Sector yn cael ei gynnwys mewn ymgynghori yn gysylltiedig â'r broses o nodi ffyrdd o wasanaethu'r cyhoedd yn well wrth i hynny esblygu a symud yn ei flaen. Nodwyd yr wybodaeth.

**Camau Gweithredu'n Codi: Y Pennaeth Gwasanaeth (Polisi) i baratoi crynodeb/ siart llif o strwythur y Rhaglen Drawsnewid Gorfforaethol i'w chylchu i aelodau sector gwirfoddol y Pwyllgor er gwybodaeth.**

## 6 MATERION CYLLIDOL

Dywedodd y Prif Swyddog Medrwn Môn - wrth i baratoadau i ffurfio cyllideb 2014/15 fynd yn eu blaen, y byddai'r Trydydd Sector yn dymuno fod yn effro i brif themâu'r trafodaethau fel bod sefydliadau'n ymwybodol o'r rhagolygon ac yn gallu cynllunio yn unol â hynny. Dywedodd y byddai'n beth da pe bai dyheadau'r Trydydd Sector yn cael eu bwydo i mewn i'r broses a bod y sector yn cael gwybod am ddatblygiadau yng nghyswllt cyfleon a bwriadau comisiynu'r Awdurdod.

Cadarnhaodd y Cyfarwyddwr Cymuned bod gwaith ar adolygu contractau'r Trydydd Sector yn parhau ac wedi cynnwys peth gwaith adferol yn ogystal â chryfhau'r prosesau. Oherwydd materion capasiti mae'r dyddiad cwblhau'r gwaith wedi ei ailosod i Hydref/Tachwedd. Cadarnhaodd y Swyddog bod gohebiaeth wedi ei hanfon i'r Trydydd Sector ynglyn â sefyllfa ariannol ddangosol y Cyngor gyda thoriadau o tua 5% yn cael eu disgwyl. Dywedodd bod yr Adran hefyd yn y broses o adolygu meysydd lle mae gweithgaredd a gwariant y Trydydd Sector yn cyd-fynd gyda bwriadau strategol a blaenoriaethau gwasanaeth. Dywedodd bod yna nifer o feysydd lle gellid gwneud arbedion ond nad oes yr un ohonynt yn cynnig cyfleon hawdd - eisoes fe gytunwyd gyda'r Trydydd Sector y bydd blaenoriaethau'n cael eu rhannu ac mae ymdrechion yn cael eu gwneud i gryfhau'r broses naturiol o ymgysylltu tra hefyd yn cydnabod bod yna le i wella ar yr ochr ffurfiol h.y. ar y prosesau "caled". Y mae'n broses heriol i nodi arbedion o fewn Gwasanaethau Oedolion; mae cyfarfod o'r Bwrdd Pobl Hŷn eisoes wedi edrych ar wariant a chynlluniau ariannol mewn manylder gyda golwg ar ganfod ffordd o ddarparu gwasanaethau sy'n gynaliadwy. Mae'r sefyllfa a'r broses ar draws y cyfan o'r Gwasanaethau Cymdeithasol yn gymhleth. Mae rhai sefydliadau sector gwirfoddol unigol nad ydynt wedi ymateb i'r cais am wybodaeth ond mae ymdrechion yn cael eu gwneud i roi sefydlogrwydd i'r rhai y mae eu gweithgareddau yn cyd-fynd â blaenoriaethau'r Gwasanaethau Cymdeithasol.

Dywedodd Arweinydd y Cyngor y bydd yn rhaid canfod arbedion o tua 5% a'i bod felly yn debygol y bydd yna doriadau yn y cyllid sy'n cael ei ddyrannu.

O safbwynt ymgynghori a chodi ymwybyddiaeth ynglyn â'r hyn sy'n digwydd gyda'r sefyllfa ariannol a phethau eraill, cafwyd awgrymiadau ynglyn â sut i gyrraedd at gymunedau e.e. drwy wahoddiad i gyfarfodydd o'r Pwyllgor Cyswllt ym mha gymuned y bynnag y byddant yn cael eu cynnal a thrwy lythyr newyddion Medrwn Môn ac ar y wefan.

Nodwyd y sefyllfa.

**Dim camau gweithredu pellach yn codi.**

**7 CYFARFOD NESAF Y PWYLLGOR CYSWLLT**

Cytunwyd y byddai'r cyfarfod nesaf yn cael ei gynnal am 2:00 p.m. dydd Gwener, 17 Ionawr, 2014 yn Neuadd Sefydliad y Merched, Llanfairpwll.

**Mr Islwyn Humphreys  
Cadeirydd**